

Media Title : Majoriti 7  
Headline : Scammer terus bermaharaja lela, di mana silapnya9  
Date : 15 February 2024  
Section : KULINARI  
Page : 32





## Scammer terus bermaharajalela, di mana silapnya?

MASYARAKAT hari ini tidak dapat lari daripada kebergantungan teknologi digital dalam mempermudah kehidupan harian.

Pun begitu, kita mudah lupa bahawa tidak semua orang menggunakan teknologi digital sebagai platform ke arah kebaikan. Buktinya, lihat sahaja paparan berita saban hari ada saja kisah masyarakat menjadi mangsa jenayah siber.

Respons Scam Kebangsaan (NSRC) baru-baru ini mendedahkan, kerugian sebanyak RM1.34 bilion membabitkan 33,235 kes jenayah dalam talian bagi tempoh 1 Januari hingga 8 Disember

2023.

Enam modus operandi yang dikenalpasti adalah jenayah pelaburan tidak wujud mencatat angka tertinggi iaitu RM437 juta, diikuti e-dagang (RM383 juta), telekomunikasi (RM334 juta), e-kewangan (RM104 juta), *love scam* (RM41 juta) dan pinjaman tidak wujud berjumlah RM39 juta.

Bayangkan nilai RM1.34 bilion tersebut mampu menampung pembelian beras berkapasiti 10 kilogram mencecah lebih 54 juta paket untuk diagihkan kepada rakyat Malaysia.

Bukan tiada kempen kesedaran dilaksanakan baik kerajaan mahupun

pihak berkuasa, tetapi setiap tahun trend jenayah online menunjukkan graf peningkatan.

Kelicikan modus operandi kumpulan *scammer* ini berjaya meraih keuntungan berbekalkan teknologi terkini.

Misalnya, mereka cenderung menggunakan wajah selebriti dalam poster promosi bertujuan 'memancing' mangsa untuk melabur pelaburan yang tidak wujud terutamanya kripto.

Dengan menjanjikan pulangan pelaburan berlipat ganda, lazimnya mangsa mudah tertarik dan dipercayai promosi berkenaan lalu sanggup melabur sehingga mencecah ratusan ringgit.

Sewajarnya masyarakat perlu berfikir rasional dengan memastikan keuntungan yang diperoleh itu realistik dan melakukan semakan latar belakang syarikat terlebih dahulu.

Lebih menyakitkan hati apabila ada kalangan *scammer* menyamar menjadi pegawai mahkamah, pegawai penyiasat, pegawai Lembaga Hasil Dalam Negeri (LHDN), pegawai bank dan tuntutan bungkusan ketika memperdayakan mangsa khususnya menerusi panggilan telefon.

Bukan sahaja tutur kata tunggang terbalik dan tidak beradab, malah menggunakan nombor telefon peribadi

berbanding talian tetap.

Secara logik, kebiasaannya organisasi kerajaan ataupun bank tidak menggunakan telefon bimbit peribadi untuk menyampaikan sebarang maklumat kepada orang ramai.

Justeru, sekiranya rasa tidak sedap hati segera matikan perbualan. Kita perlu lebih peka dengan keadaan agar tidak menjadi mangsa *scammer*.

Terbaharu, mereka beralih pula kepada platform khidmat pesanan seperti WhatsApp, Telegram, Facebook Messenger, Skype atau Viber untuk mencuri duit anda.

Selain itu, *scammer* turut menggunakan taktik menjadi pegawai NSRC kononnya mahu memberi peluang pekerjaan dan cabutan bertuah.

Persoalannya, bagaimana *scammer* boleh memperoleh nombor telefon peribadi dan data peribadi? Adakah terdapat kebocoran data tanpa kita sedari?

Sukar Ejen M memperhalusi punca kepincangan dalam membendung peningkatan trend jenayah online. Namun begitu, suka untuk diingatkan agar orang ramai sentiasa berwaspada ketika melakukan urusan niaga, transaksi, pelaburan ataupun memberi maklumat peribadi dalam talian.

Ingat ya, tiada jalan singkat meraih keuntungan!



Orang ramai dinasihatkan sentiasa berwaspada ketika menerima panggilan telefon daripada individu tidak dikenali.